

Tantaz tanta ekimenak biharko itsasorako deialdia bertan behera utzi du, eta helburuak bete direla adierazi

Entzutegi Nazionalak gaur emandako autoa ikusita, Tantaz Tanta ekimenak Bilbon bihar egitekoa zen itsasoa eta aurreikusitako ekimen guztiak bertan behera uztea erabaki du.

Tantaz Tanta ekimenaren elementu nagusia ez zen manifestazioa, logotipo bat edo ekimena aurrera eraman dugun pertsonak. Garrantzitsuena lanerako filosofia da, eta agerikoa da kanpaina arrakastatsua izan dela alderdi horretatik, eta helburuak bete dituela.

Duela aste batzuk adierazi genuen gauzak aldatu egingo zirela. Eta halaxe izan da, aldatu egin dira. Zergatik? Gu aldatu garelako. Orain guztiok tantak gara, gutako bakoitzak eginkizun bat du, ilusio bat, jabetu gara sakabanaketaren amaiera gure esku dagoela, eta itsaso bihurturik lortuko dugula.

Oraintxe hasiko da, beraz, presoak Euskal Herrira ekarriko dituen itsaso handi hori.

Itsaso horren indarra herri eta auzo guztietara bideratzeko gonbidapena egin nahi dizuegu. Gure ustez garrantzitsua da hurrengo hilabeteetan presoen eskubideen aldeko mobilizazioak ugaltzea Euskal Herri osoan, dinamika zabal eta pluralen bidez, herri bakoitzean gehiengoaren borondatea nabarmen gera dadin.

Marea hau sektore sozial guztietara ere eramateko eskatzen dizuegu. Artistak, kirolariak, kazetariak, abokatuak, medikuak, ikasleak... tanta guztiok busti dezakegu gure ingurua. Hortaz, arlo guztietan ekimen sektorial berriak martxan jartzeko gonbidapena egiten dizuegu, sakabanaketaren amaiera helburu.

Tantaz tanta, itsasoa gara

Lortuko dugu!